

NAQQIUT

Ataatsimiititaliap isumaliutissiissutaa 19. oktobari 2023 ullulerneqartoq taarserpaa
(Allannguutissatut siunnersuut pillugu immikkoortoq nutaaq, inassuteqaatit nutaat)

**Kalaallit Nunaannut suliffissarsiortarnek pillugu Inatsisartut inatsisaata
allanngortinneqarnera pillugu Inatsisartut inatsisaattut siunnersuummik
saqqummiussinissamik Naalakkersuisut peqquneqarnissaannik Inatsisartut
aalajangiiffigisassaattut siunnersuut. Inatsisissatut siunnersuut nunatsinnut nuuttut kalaallit
kulturiannik, oqaasiinik naleqartitaannillu ilinniarnissamut piumasaqaatitalimmik
periarfissinneqarnissaannik aalajangersaassaaq. Inatsisissatut siunnersuut
kingusinnerpaamik UKA2024-mi Inatsisartunut saqqummiunneqassaaq. Inatsisissamik
piareersaasiorluni suliaqarnerup peqatigisaanik, Kalaallit Nunaanni inuiaqatigiinnut
akuusitsilersitsinissamik inatsimmik atulersitsinissaq pillugu Naalagaaffeqatigiinni
oqartussaasunut Naalakkersuisut saaffiginnissuteqassapput.
*Inatsisartunut ilaasortamit Agathe Fontainimit, Inuit Ataqatigiit
Inatsisartunut ilaasortamit Kristian Jeremiassenimit, Inuit Ataqatigiit, tiguneqarluni
saqqummiunneqartoq***

pillugu

Inuussutissarsiornermut Aatsitassanullu Ataatsimiititaliap

siunnersuutip aappassaaneerpeqarneranut

ISUMALIUTISSIISSUTAA

Ataatsimiititaliap kingullermik suliarinninnermini ilaasortarai:

Inatsisartunut ilaasortaq Karl Tobiassen, Siumut, Siulittaasoq
Inatsisartunut ilaasortaq Emanuel Nûko, Naleraq, Siulittaasup tullia
Inatsisartunut ilaasortaq Lars Poulsen, Siumut
Inatsisartunut ilaasortaq Kuno Fencker, Siumut
Inatsisartunut ilaasortaq Mariane Paviassen, Inuit Ataqatigiit
Inatsisartunut ilaasortaq Mikivsuk Thomassen, Inuit Ataqatigiit
Inatsisartunut ilaasortaq Aqqalu Jeremiassen, Atassut

UPA2023-mi 4. maajimi siullermeerinninnerup kingorna siunnersuut ataatsimiititaliamit
misissorneqarpoq.

1. Siunnersuutip imarisaa siunertaalu

Kalaallit Nunaannut suliffissarsiortarneq pillugu Inatsisartut inatsisaata nr. 27, 30. oktobari 1992-imeersup allangortinneqarnera pillugu Inatsisartut inatsisaattut siunnersuummik saqqummiussinissamik Naalakkersuisut Inatsisartunit peqquneqarnissaat aalajangiiffisassatut siunnersuummi matumani siunnersuuteqartup kissaatigaa. Nunatsinnut nuuttut kalaallit kulturiannik, oqaasiinik naleqartitaannillu ilinniarnissamut pitsaanutsummik periarfissinneqarnissaannut qulakkeerisunik inatsisissatut siunnersuummi piumasaqaatinik aalajangersaasoqarnissaa siunnersuuteqartup kissaatigaa. Siunnersuuteqartup siunnersuutiminut ilaatigut tunngavilersuutigaa, ukiuni kingullerni nunatsinnut nuuttut amerliartormata aaqqissuussamik akuutitsilernerup pisariaqarnera ersarissisimasoq. Tassunga atatillugu siunnersuuteqartup ersarissarpaa, nunatsinnut nuuttut kalaallit naleqartitaannik, oqaasiinik kulturiannillu ilinniarnissaat pingaaruteqartoq. Kiisalu siunnersuuteqartup kissaatigaa, inatsisissamik piareersaasiarluni suliaqarnermut atatillugu Kalaallit Nunaanni inuiaqatigiinnut akuutitsilernissamik inatsimmik peqatigisaanik atulersitsinissaq pillugu Naalagaaffeqatigiinni oqartussaasunut Naalakkersuisut saaffiginnissuteqassasut.

2. Naalakkersuisut allanguutissatut siunnersuutaat

UPA2023-mi siullermeerinninnermi Naalakkersuisut akissuteqaatiminni imaattumik allanguutissatut siunnersuummik saqqummiussipput:

”Kalaallit Nunaannut suliffissarsiortarneq pillugu Inatsisartut inatsisaata allangortinneqarnera pillugu Inatsisartut inatsisaattut siunnersuummik saqqummiussinissamik Naalakkersuisut peqquneqarnissaannik Inatsisartut aalajangiiffisassaattut siunnersuut. Inatsisissatut siunnersuut nunatsinnut nuuttut kalaallit kulturiannik, oqaasiinik naleqartitaannillu ilinniarnissamut piumasaqaatitalimmik periarfissinneqarnissaannik aalajangersaassaaq. Inatsisissatut siunnersuut kingusinnerpaamik UKA2024-mi Inatsisartunut saqqummiunneqassaaq.”

Kingornali taanna allanguutissatut siunnersuut Naalakkersuisut tunuartillugu, aappassaaneerinninnissamut akissuteqaatiminni allanguutissatut siunnersuut nutaaq (ulloq 11. oktobari) imaattoq Naalakkersuisut saqqummiuppaat:

”Akuutitsinermut suliassaqarfimmi inatsisitigut killiliussanut tunngatillugu kingusinnerpaamik UPA2025-mi siunnersuummik saqqummiusseqqullugit Naalakkersuisut peqquneqassasut Inatsisartut aalajangiiffisassaattut siunnersuut. Danskit oqartussaasuinik suleqatigiinneq aallaavigalugu aaqqiissutissaq sorleq malillugu suliap nanginneqarnissaa pillugu Naalakkersuisunit isummerfigineqareerpat siunnersuut saqqummiunneqassaaq. Danskit oqartussaasuinit suleqatigiinneq imaluunniit Folketingimi inatsisiliornerup ingerlanera pissutigalugu Naalakkersuisut

*kingusinnerpaamik UPA2025-mut siunnersuummik saqqummiussinngippata,
Naalakkersuisut Inatsisartuni ataatsimiititaliaq attuumassuteqartoq
saqqummiussinissamut amigaataasumut suna pissutaanersoq pillugu
ilisimatitsissapput”.*

Naalakkersuisut aappassaaneerinninnissamut akissuteqaatiminni ilisimatitsissutigaat, Naalakkersuisut suliassaqarfimmik aqutsinissaq siunertaralugu aaqqiissutissanik nassaarnissaq pillugu suleqatigiinnissamut danskit nunani allamiunut akuutitsinermullu ministeriat isumaqatigiissuteqarfigalugu, tassunga ilanngullugit Kalaallit Nunaannut akuutitsineq pillugu inatsisiliornissaq kiisalu sulisussanut avataaneersunut oqaatsinik aamma kulturimik ilinniartitsineq pillugu inatsisiliornissaq.

Una isumaqatigiissutigineqaqqammersoq tunngavigalugu akuutitsinermut suliassaqarfimmi marloqiusamik aqutsineq aamma inatsisilik allannguinerit naleqqutinningsut pinngitsoortinniarlugit Naalakkersuisut allannguutissatut siunnersuutaat nutaaq saqqummiunneqarpoq.

3. Siunnersuutip Inatsisartuni siullermeerneqarnera

Siunnersuummik siullermeerinninnermi partiit akornanni siunnersuut nalinginnaasumik tapersernerpoq. Kalaallit Nunaata aningaasaqarnera ineriartortissinnaajumallugu sulisartut nunanit allaneersut pisariaqartinneqartut aammalu nuuttut tikilluaqqusaasutut misiginissaat pingaaruteqartoq isumaqatigiissutigineqarpoq. Taamaattumillu kalaallit kiinnerluartarnissat pingaaruteqartoq oqaatigineqarpoq. Tamatuma peqatigisaanik erseqqissaatigineqarpoq kalaallit oqaasiisa naleqartitaasalu qulakkeerneqarnissaat pisariaqartoq, taamaattumillu nunatsinni inuiaqatigiinnut akuulernissami nuuttut qanoq naatsorsuuteqarfigineqarnerannut sinaakkutissat erseqqissuusariaqarput. Kiisalu sulisartut kalaallit salliutinneqarnissaat pingaaruteqartoq oqaatigineqarpoq. Taamaattumillu Kalaallit Nunaanni atukkanut tulluarsakkamik akuutitsilernermik politikimik ilusilersuinissap pingaaruteqarnera oqaaseqartunit tamanit erseqqissarneqarpoq.

Naalakkersuisut akissuteqaataanni allaqqavoq 2023-ili upernaavani Kalaallit Nunaannut akuulertitsilerneq pillugu inatsimmik suliqaartoqarnissaanik kissaateqarneq pillugu Naalakkersuisut qallunaat oqartussaasuinut attaveqareersimasut. Tamanna pissutigalugu Naalakkersuisut allannguutissatut siunnersuummik imaattumik, siullermeerinninnermi taperserneqarluartumik, saqqummiussipput (aappassaaneerinninnerli sioqqullugu Naalakkersuisut allannguutissatut siunnersuummik nutaamik saqqummiussinermikkut taanna tunuartippaat):

”Kalaallit Nunaannut suliffissarsiortarneq pillugu Inatsisartut inatsisaata allanngortinneqarnera pillugu Inatsisartut inatsisaattut siunnersuummik saqqummiussinissamik Naalakkersuisut peqquneqarnissaannik Inatsisartut aalajangiiffigisassaattut siunnersuut. Inatsisissatut siunnersuut nunatsinnut nuuttut kalaallit kulturianik, oqaasiinik naleqartitaannillu ilinniarnissamut

piumasaqaatitalimmik periarfissinneqarnissaannik aalajangersaassaaq. Inatsisissatut siunnersuut kingusinnerpaamik UKA2024-mi Inatsisartunut saqqummiunneqassaaq.”

Suliassaqarfik pillugu nammineq inatsisiliorsinnaaneq qulakkeerumallugu nunanut allanut suliassaqarfiup nunatta Danmarkimit tigusariaqaraa oqaatigineqarpoq.

“Nunatsinnut nuuttut” aamma “nunanit allanit suliartortut” isumaasa nassuiarneqarnissaat pisariaqartinneqartoq siullermeerinninnermi tamanit sammineqarpoq. Nunatta naatsorsueqqissaartarfiata allamiutut taasimasaannut kisitsisini danskit savalimmiormiullu ilaangitsut maluginiarneqarpoq. Taamaattumillu oqaluuserineqarpoq danskit savalimmiormiullu “nuuttutut” taagorneqassanersut.

“Nunatsinnut nuuttut” aamma “nunanit allanit suliartortut” isumaasa nassuiarneqannginnerat tunngavigalugu siullermeerinninnerup aappasaaneerinninnerullu akornanni siunnersuut ataatsimiititaliamit suliarneqartussanngorlugu innersuunneqarpoq.

4. Naalakkersuisunut apeqqutit

Ataatsimiititaliap siunnersuummik suliagarneranut atatillugu ataatsimiititaliap Naalakkersuisunut apeqqutinik ulloq 5. juuli 2023-mi nassiussaqqarpoq. Apeqqutit ulloq 14. agusti 2023-mi akissuteqarfigineqarput. Ataatsimiititaliap apeqqutai Naalakkersuisullu akissutaat ilanngussaq 1-itut ilanngunneqarput.

5. Naalakkersuisunit saaffiginnissut

Ataatsimiititaliap immikkoortumik suliarinninneranut atatillugu Naalakkersuisut ulloq 18. septembari 2023-imi ilisimatitsiffiusumik ataatsimeeqatiginissaat ataatsimiititaliamit qinnutigineqarpoq. Isumaginninnermut, Suliffeqarnermut Nunamullu Namminermut Naalakkersuisuminngaanniit paasissutissiiviusumik ataatsimiigiaqqusissutit assilinera matumani isumaliutissiissummi ilanngussaq 2-tut kakkiunneqarpoq.

6. Ataatsimiititaliap siunnersuummik suliarinninnera

Nunatsinnut nuuttut kalaallit kulturiannik, oqaasiinik naleqartitaannillu ilinniarnissamut periarfissinneqarnissaat siunnersuuteqartup siunnersuutimigut qitiutinneqassasoq kissaatigaa. Nunatsinnut nuuttut kalaallit oqaasiinik ilinniarnissaat siunnersuuteqartutuulli ataatsimiititaliap pingaartutut isigaa, ilaatigut taakku inuiannut kalaallinut sullissisuunissaat tunngavigalugu.

Kalaallit Nunaanni ataatsimut isigalugu sulisussaaleqisoqartoq, tamannalu inuussutissarsiornerup ilusiligaanerata assigiinngisitaarnerunissaanik, taamaalillunilu aamma aningaasaqarnerup pitsaanerunissaanik qulakkeerinninnissamut annertuumik unammillernartoqartitsilerneru Aningaasaqarnermut Siunnersuisoqatigiinnit tikkuarneqartoq maluginiarneqarpoq. Taamaattumillu sulisinnaasut amerlisarneqarnissaat imaluunniit sulisussat nunanit allaneersut amerlanerit kajumilersinneqarnissaat pisariaqartinneqartoq Aningaasaqarnermut Siunnersuisoqatigiit naliliipput.

Inuiaqatigiilli katitigaaneranni nalinginnaasumik allannguutit nunanilu amerlasuuni sulisiinnaasut ikiliartornerat pissutigalugit sulisussanik piginnaanilinnik siunissami sulisussarsiorsinnaanerup ajornakusoorsinnaanera naatsorsuutigineqartariaqartoq Aningaasaqarnermut Siunnersuisoqatigiinnit tikkuarneqartoq maluginiarneqarpoq.¹

Nunatsinnut nuuttut amerliartortillugit Kalaallit Nunaanni inuiaqatigiinnut akuutitsilernerup iluatsilluartumik ingerlasarnissaa siunertaralugu nunatsinnut nuuttunut piumasaqaatinik aalajangersimasunik saqqummiussisarnissap pisariaqalernerata isiginiarnissaa ataatsimiititaliamit aamma pingaartutut isigineqarpoq.

Tamatumali peqatigisaanik ataatsimiititaliamit erseqqissarneqassaaq, nunatsinnut nuuttut tikilluaqqusaasutut misiginissaat aamma kalaallisut oqaatsit ilinniarnissaannut inuiaqatigiinnilu ataatsimoorfinnut ilanngunniarnermut namminneq piumassuseqalernissaat pingaaruteqarmat. Taamaammat nunatsinnut nuuttut kalaallit kulturiannik, oqaasiinik naleqartitaannillu ilinniarnissamut pitsaannerusumik periarfissinneqarnissaasa qulakkeerneqarnissaanik piumasaqaat ataatsimiititaliap isumaa naapertorlugu kalaallit oqaasiinut kulturianullu ilinniarusulersitsisussanik suliniutinik tapertaqartinneqartariaqarpoq.

Kalaallit oqaasiinik, kulturiannik naleqartitaannillu ilinniarnissamut nunami allamiut periarfissinnerisigut pisinnaatitaaffimminnik ilisimasaqalernissaat qulakkeerneqarlunilu inuit ataatsimooqatigiiffianni peqataanissamut periarfissinneqassasut ataatsimiititaliaq isumaqarpoq. Taamaaliornikkut nunami allamiut nunatsinni inuiaqatigiinni ajornannginnerusumik peqataasinnaalissapput. Sulisut tikisitat sivisunerusumi sulisoriinnarnissaat annertuumik periarfissiissasoq Aningaasaqarnermut Siunnersuisoqatigiinnit erseqqissaatigineqartoq ataatsimiititaliamit tassunga atatillugu maluginiarneqarpoq: “Nunamut nuuttut nutaat pingajorarterutaat ukiumi siullermi utertarput, taamaallaallu 20%-ii ukiut arfineq marluk qaangiunneranni utertarlutik. Kalaallit Nunaanniinneq assersuutigalugu ukiumik ataatsimik sivitsoraanni, sulisut inunnik 500-600-nik amerlineqassapput (ukiumi ataatsimi nunamut nuuttartut amerlaqataat)”².

Peqataatsinissamut politikkimik nunatsinni pissutsinut naleqqussakkamik ilusilersuinissap pingaaruteqarnerata oqaaseqartartunit tamanit erseqqissaatigineqartoq ataatsimiititaliamit maluginiarneqarpoq. Peqataatsinissamut politikki danskit akisussaaffigigaat Naalakkersuisut ataatsimiititaliap apeqqutaanut nassiunneqartunut akissumminni (takuuk Ilanngussaq 1) Naalakkersuisut paasissutissiissutigigaat ataatsimiititaliamit maluginiarneqarpoq.

Kalaallit oqaasiinik ilinniarnissamut ullumikkut periarfissaqartoq aammalu oqaatsinut politikki pillugu Inatsisartut inatsisaat nr. 7, 19. maj 2010-meersoq Naalakkersuisut suliffeqarfimmi

¹ Økonomisk Råd Rapport 2. halvår 2023.

² Økonomisk Råd Rapport 2. halvår 2023, s. 14

kattuffinnik susassaqtunillu isumasioqateqareernermikkut pikkorissartitsinermik atuartsinermillu neqeroorutini peqataasinnaatitaanermut malittarisassanik erseqqinnerusunik aalajangersaasinnaaneranmut periarfissiisoq Naalakkersuisut erseqqissaatigaat. Taamaattorli pikkorissartitsinermik atuartsinermillu neqeroorutit ineriartortinneqarsinnaassappata tamatumunnga aningaasanik immikkoortitsisoqartariaqarpoq.

Taamaalillutik Naalakkersuisut naliliipput aporfiit annerpaat tassaasut: *”anigaasaqarnermut tunngasut imatut paasillugu, aningaasaliissutinik amerlanerusunik immikkoortitsisoqarpat, maannamut neqeroorutit ineriartortinneqarsinnaapput itisilerneqarlutillu. Tamatuma saniatigut suliassaqarfik pitsanngoriartinneqarsinnaavoq Danmarkip, suliassaqarfimmik akisussaasup, inatsiseqarnej annertusaaffigippagu”*. Naalakkersuisut Nunat Allamiunut Akuutitsinermullu Ministerimut, Kaare Dybvad Bekimut, pingaartumik nunanit allaneersunik peqataatitsinissamut suliassaqarfiup oqallisigineqarnissaa siunertaralugu piffissami 2023-mi 4. septembarimit 7. septembarimut tikeraartumut saaffiginnissimasut ataatsimiititaliamit maluginiarneqarpoq.

“Nunatsinnut nuuttut” aamma “nunanit allanit suliartortut” isumaannik nassuiaanissap pisariaqarneranik siullermeerinninnermi saqqummiunneqartumut tunngatillugu siunnersuummi matumani innuttaasut kikkut pineqarnerisa ersarissarneqarnissaa amigaataasorinarpoq. Kalaallit Nunaannut suliffissarsiortarneq pillugu Inatsisartut inatsisaata allanngortinneqarnera pillugu Inatsisartut inatsisissaattut siunnersuummik saqqummiussinissamik siunnersuuteqartup siunnersuutaata aammalu Naalakkersuisut siunnersuummut matumunnga allannguutissatut siunnersuutaata nunatsinnut nuuttut matumani siunnersuummi pineqartut inatsimmi taaneqartumi ilaatinneqarnissaat paasinarsitippaat.

Inatsisartut inatsisaata taaneqartup siunertaraa, sulisut kalaallit Kalaallit Nunaanni sulisinnaanissaminnut salliutinneqarnissaasa qulakkeernissaa, taannalu atorfinni assigiinngitsuni aalajangersimasuni atorfinitsitsinermi atuuppoq. Inuit Kalaallit Nunaanni inunngorsimasut aammalu inunngornerminniit ukiut tallimat siulliit nunami najugaqavissimasut sulisartutut kalaaliusutut isigineqarput. Allat avataaniit suliartortutut isigineqarput, tassa pineqartut Kalaallit Nunaannut immikkut ittumik attuumassuteqarsimangippata. Siunnersuuteqartup kissaatigaa taakkununnga inatsisissatut siunnersuummi piunasaqaatinik aalajangersaasoqassasoq, taamaaliornikkut nunatsinnut nuuttut kalaallit kulturiannik, oqaasiinik naleqartitaannillu ilinniarnissaminnut periarfissaasa pitsaanerulernissaat qulakkeerneqassalluni. Kalaallit sulisinnaasut sulisinnaasunit nunanit allameersunit salliutinneqartussaanerannik aalajangersagaq allanngortinniarneqanngitsoq ataatsimiititaliap paasivaa, siunnersuutikkulli nunatsinnut nuuttut kalaallit kulturiannik, oqaasiinik naleqartitaannillu ilinniarnissaminnut periarfissaasa pitsaanerulernissaat qulakkeerniarneqartoq.

Inatsisartut inatsisaannut taaneqartumut tunngatillugu nunatsinnut nuuttunut aalajangersimasuni atorfinniittunut tamanna taamaallaat atuunera ataatsimiititaliap maluginiarpa. Siunnersuummi pineqartup aappaanut tunngatillugu, Kalaallit Nunaanni inuiaqatigiinnut akuutitsilernissamik inatsimmik peqatigisaanik atulersitsinissamut tunngasumut, ataatsimiititaliap maannangaq

isumaqarpoq, Kalaallit Nunaanni sulerusullutik nunatsinnut nuuttunut kalaallit kulturiannik, oqaasiinik naleqartitaannillu ilinniarnissaannut pitsaannerusumik periarfissiinissap qulakkeerneqarnissaanut inatsisissatut siunnersuummi piumasaqaatinik aalajangersaanissamik siunnersuuteqartup kissaataa nuuttunut Kalaallit Nunaanni sulinissamik kissaateqartunut tamanut atuuttariaqartoq. Nunatsinnut nuuttut tamarmik kalaallit kulturiannik, oqaasiinik naleqartitaannillu ilinniarnissaannut pitsaannerusunik periarfissaqarsinnaanerisa qulakkeerniarlugu Kalaallit Nunaannut akuutitsinermut inatsisissami piumasaqaatinik aalajangersaanissaq ataatsimiititaliap pingaaruteqartutut isigaa.

Schengenimi isumaqatigiissut siullermeerinninnermi taaneqartoq ataatsimiititaliamit maluginiarneqarpoq, taamaattumillu imm. 56-imut, Schengenimi isumaqatigiissummut tunngasumut, isumaliutissiissut innersuussutigineqarpoq.

Siuliani allassimasut tunngavigalugit Naalakkersuisut suliaasa inerneranik takunissaq ataatsimiititaliap qilanaarivaa. Taamaalilluni Naalakkersuisut suliamik ingerlatseqqinnerminni siunnersuutip siullermeerneqarnera isumassarsiorfigissagaat ataatsimiititaliap naatsorsuutigaa.

7. Siunnersuutip aningaasaqarnikkut kingunerisassai

Inatsisartut suleriaasianni § 33, imm. 1-imi allassimavoq, aalajangiiffigisassatut siunnersuutip piviusunnigortinneqarnerani aningaasaqarnikkut allaffissornikkullu kingunerisassai siunnersuummut tunngavilersuummi allaaserineqassasut. Tamanna naapertorlugu siunnersuutip piviusunnigortinneqarnerani aningaasaqarnikkut kingunerisassai ima nalunaarneqartut Naalakkersuisoqarfiit tamarmik inatsisiliornissamut peqataassasut aammalu susassaqartut suleqatigineqarnerata pilersarusiorlugulu ataqatigiissarnissaa pisariaqartoq. Inatsisissatut siunnersuummik Naalakkersuisunit akuerineqartussamik suliaqarnermi allaffissornikkut isumalluutit ataatsimut atorneqartut A/C fuldmægtigip ukioq kaajallallugu sulineratut aningaasartuutaanissaat naatsorsuutigineqarpoq, tassa 500.000 koruunit.

8. Ataatsimiititaliap inassuteqaatai

- Ataatsimiititaliami amerlanerussuteqartut Inuit Ataqatigiit, Siumut Atassutillu ilaasortaataa siullermeerinninnermi Naalakkersuisut allannguutissatut siunnersuutaat 11. oktobarimeersup akuerineqarnissaa inassutigaa.
- Ataatsimiititaliami ikinnerussuteqartut Naleqqap ilaasortaataata siunnersuutip itigartinneqarnissaa inassutigaa
- Ataatsimiititaliami ikinnerussuteqartup Naleqqap ilaasortaataa imaattumik ikinnerussuteqarluni oqaaseqaateqarpoq:

“Naleqqamiit nunasiniartut suliarthoraannartullu assigiimmik pineqarnissaat pingaartitaraarput.

Suiaassuseq sumiuussuserlu apeqqutaatinnagu, nunatsinnut suliarthoraartut assigiimmik pineqarnissaat anguniagaraarput.

Allamiuluarnermik siunnersuummi inissisimanikuuneq akuersaarnagu, pisariaqarsoraarput nunatsinnut suliarthoraartut avataaneersut ersarissumik assigiimmik pineqarnissaat piffissanngorsoraarput.

Naleqqamiit danskiuguit, norskiuguit thailandermiuuguilluunniit apeqqutaatinnagu, avataaneersut ersarissumik atugassaritinneqarnissaat piffissaasorilerparput. Tamannalu danskit suliasarinngilaat, kisiannili nunatsinni kalaallit sinnerlugit partiit isummerfissaralugit.

Ukiut qassit nunatsinni najugaqarsinnaatitaanissaa, piffissarlu qaangiuppat aggerfimminut angerlarnissaa anguneqassappat nunani allanituulli, nunatta ineriartornissaanut aaqqissuulluagaappat iluaqutaasinnaanera eqqumaffigaarput.

Nunatsinni utoqqaliniangikkaluarlutik suliarthorusuttut assigiimmik tikilluaqqusaanissaat aamma pingaaruteqarpoq, naak nunaqavissuunngikkaluarlutik”.

Ataatsimiititaliap taama oqaaseqaateqarluni isumaliutissiisummilu allassimasutut paasinnilluni siunnersuut aappassaaniigassanngortippaa.

Karl Tobiassen
Siulittaasoq

Emanuel Nûko
Siulittaasup tullia

Mariane Paviasen

Mikivsuk Thomassen

Lars Poulsen

Kuno Fencker

Aqqalu Jerimiassen